



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

29 Janeiru 2016

Tribunál Distritál Dili

Tribunál suspende pena prizaun ba krime maus tratus ba kónjuje

Iha 27 Janeiru 2016, Tribunál Distritál Dili prejide leitura akordaun no kondena arguidu FLB tanba provadu komete krime violénsia doméstika hasoru nia feen, iha Distritu Díli.

Ministériu Públiku akuza katak iha 28 Janeiru 2015, iha sms ida tama iha arguidu nia telemóvel. Iha sms ne'e husu arguidu atu ba hasoru, tanba ne'e arguidu ho lezada diskute malu, arguidu basa dala barak iha lezada nia oin, basa dala 2 iha lezada nia hasan no tuku iha lezada nia oin sai metan.

Iha data no fulan ne'ebé la apuradu, maibe maizumenus iha tinan 2011, arguidu basa lezada nia ibun dala barak tanba arguidu ho lezada diskute malu kona-ba arguidu sai servisu no fila ba uma kalan.

Iha tinan 2012, data nomós fulan ne'ebé la apuradu, arguidu basa dala barak iha lezada nia hasan loos, tanba arguidu ho lezada diskute malu wainhira lezada haruka arguidu kous sira nia oan arguidu lakohi.

“Suspensaun ba pena prizaun nesesariu atu prevene krime, maibé JSMP hanoin katak tribunál bele aplika mós dever adisionál atu asegura kondenadu nia kumprimentu ba pena ne'e. JSMP hanoin katak apresentasaun periódika ka dever sira seluk mós persiza konsidera atu garante katak kondenadu sente katak suspensaun ne'e iha nia efeitu,” dehan Luis de Oliveira Sampaio, Diretor Ezekutivu JSMP.

Ministériu Públiku akuza arguidu kontra artigu 154 Kódigu Penál kona-ba maus tratus ba kónjuje konjuga ho artigu 2, 3 no 35 alinea a husi Lei Kontra Violénsia Doméstika.

Iha julgamentu arguidu hili direitu nonok. Mesmu nune'e, depoisde tribunál konfirma fali ho lezada, lezada deklara katak faktus sira iha akuzasaun ministériu públiku ne'e loos hotu. Aleinde ne'e lezada mós deklara katak depoisde akontesementu sira hela separadu kuaze semana rua,

Rua setubal, Colmera, Dili Timor Leste

PoBox: 275

Telefone: 3323883 |77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

maibe depois familia husi parte rua rezolve ona problema ne'e tuir kultura, no arguidu ho lezada kontinua moris hamutuk hanesan feen ho laen.

Iha alegasaun final, ministériu públiku mantein akuzasaun tanba arguidu hatene katak nia iha obrigasaun atu fo protesasaun ba nia feen, maibe arguidu mak halo violénsia hasoru nia feen. Ministériu Públiku konsidera katak faktus hotu provadu, tanba ne'e husu ba tribunál atu kondena arguidu ho pena prizaun tinan 2 suspende ba tinan 3.

Enkuantu defeza haktuir katak, arguidu husu diskulpa ona tuir kustume, lezada mós perdua ona arguidu, tanba ne'e husu ba tribunál fo pena ne'ebé kman ba arguidu.

Depoisode rona tiha alegasaun husi parte sira, bazeia ba faktu provadu sira ne'ebé produs durante julgamentu tribunál konklui prosesu ne'e no kondena arguidu ho pena prizaun tinan 2 suspende ba tinan 3 no selu kusta judisial US\$20.00.

Tribunál mós halo advertensia ba arguidu katak tribunál la kondena arguidu imediata ba prizaun, maibe arguidu labele halo kualker krime, kuandu arguidu halo krime ruma, tribunál sei revoga sentensa no haruka arguidu ba prizaun efetiva.

JSMP apresia tribunál fo advertensia ba kondenadu, husi advertensia ne'e iha efektu pozitivu ba prevene hahalok violénsia. JSMP hatene katak comunidade barak hakruk ba informasaun husi tribunál, tanba ne'e advertensia husi juis importante tebes ba pena hirak ne'ebé tribunál suspende nia ezekusaun.

Kazu ne'e rejista iha tribunál ho Nú. Prosesu: 0076/2015.DICMR. Julgamentu ne'e prejide hosi juis kolektivu Dra. Zulmira da Silva, Dra. Ana Paula Fonseca no Dra. Ercilia de Jesus. Ministériu Públiku representa hosi Dra. Ivonia Maria Guterres substitui iha leitura akordaun mak Dr. Osorio de Deus no arguidu hetan defeza hosi Dr. Manuel Sarmiento hosi Defensória Públiku.

Atu hetan informasaun liutan bele kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org